

Ёлюм сормагъанлай келеди,  
Къара ат акъ къарда ёледи.

Жингирикден шок атылды,  
Къара ат акъ къаргъа жыгъылды.

Кёп чаришде атланы озгъан,  
Кёп жолда туякълары къызгъан,

Кёп кечеги кёпюрден ётген,  
Окъла сызгъыргъанларын эштген,

Кёп ариу келинле келтирген,  
Къылыч суурулгъанын кёрген

Къара ат акъ къарда ёледи,  
Ахыр сагъат алай келеди.

Жютюкзулакъ, бийиктуякъ ат,  
Сыйдам белли, жукъажыякъ ат,

Харамлыкъ билмей чабыучу ат,  
Кючюн аямай барыучу ат –

Къара ат акъ къарда ёледи.  
Кёзюнден жиямукъ келеди.

Ёледи огъундан бетсизни,  
Ариулугъу ташлайды бизни.

Къара ат акъ къарда ёледи,  
Тауланы туманда кёреди.

Къара ат жыгъылды акъ жолда.  
О, къаллай ариулукъ жоюлду!..

Ёлюм сормай-ормай келеди.  
Къара ат акъ къарда ёледи.

1965